

**«ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆ»
ՊԵՏԱԿԱՆ ՈՉ ԱՌԵՎՏՐԱՅԻՆ ԿԱԶՄԱԿԵՐՊՈՒԹՅԱՆ ԳԻՏԱԿԱՆ ԽՈՐՀՐԴԻ**

ՈՐՈՇՈՒՄ

2 Մարտի 2021, N 8 - 2

**ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆԻ «ԱՄԲԵՐԴ»
ՀԵՏԱԶՈՏԱԿԱՆ ԿԵՆՏՐՈՆԻ 2021 ԹՎԱԿԱՆԻ ԳՈՐԾՈՒՆԵՈՒԹՅԱՆ ԾՐԱԳԻՐԸ
ՀԱՍՏԱՏԵԼՈՒ ՄԱՍԻՆ**

Ղեկավարվելով «Նորմատիվ իրավական ակտերի մասին» Հայաստանի Հանրապետության օրենքի 34-րդ հոդվածով, Հայաստանի Հանրապետության կառավարության 2005 թվականի հոկտեմբերի 6-ի N 1718-Ն որոշման 1-ին կետով հաստատված «Հայաստանի պետական տնտեսագիտական համալսարան» պետական ոչ առևտրային կազմակերպության կանոնադրության 17-րդ կետի 8-րդ ենթակետով՝ «Հայաստանի պետական տնտեսագիտական համալսարան» պետական ոչ առևտրային կազմակերպության գիտական խորհուրդը **ո թ ո շ ու մ է.**

1. Հաստատել Հայաստանի պետական տնտեսագիտական համալսարանի «Ամբերդ» հետազոտական կենտրոնի 2021 թվականի գործունեության ծրագիրը՝ համաձայն հավելվածի:
2. Սույն որոշումն ուժի մեջ է մտնում ընդունման պահից:

Գիտական խորհրդի նախագահ՝

2020 թ. մարտի 2

Երևան



Դ. Ռ. Գալոյան

Հավելված
«Հայաստանի պետական տնտեսագիտական
համալսարան» պետական ոչ առևտրային
կազմակերպության գիտական խորհրդի
2021 թվականի մարտի 2-ի N 8 - 2 որոշման

**ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆԻ
«ԱՄԲԵՐԴ» ՀԵՏԱԶՈՏԱԿԱՆ ԿԵՆՏՐՈՆԻ
2021 ԹՎԱԿԱՆԻ ԳՈՐԾՈՒՆԵՈՒԹՅԱՆ ԾՐԱԳԻՐ**

ՆԵՐԱԾՈՒԹՅՈՒՆ

Սույն ծրագիրը մշակվել է՝ ելնելով «Հայաստանի պետական տնտեսագիտական համալսարան» պետական ոչ առևտրային կազմակերպության (այսուհետ՝ Համալսարան) գիտական խորհրդի 2020 թվականի ապրիլի 6-ի N 8-1 որոշմամբ հաստատված «Հայաստանի պետական տնտեսագիտական համալսարանի 2020-2024 թթ. գիտահետազոտական գործունեության զարգացման ռազմավարական ծրագրով» ամրագրված հիմնական ուղղություններից և գերակայություններից:

Որպես համալսարանական ուղեղային կենտրոն՝ վերոնշյալ որոշմամբ ամրագրված գերակայություններն իրագործելու նպատակով և նման հաստատություններին բնորոշ ձևաչափով ու գործիքակազմով 2021 թվականին «Ամբերդ» հետազոտական կենտրոնը (այսուհետ՝ Կենտրոն) շարունակելու է իր ներուժը ներդնել Համալսարանի հետազոտական կարողությունների զարգացման, Հայաստանում հանրային քաղաքականության բարելավման, ակադեմիական խոսույթի հարստացման, նոր գաղափարների գեներացման, կիրառական և միջգիտակարգային ուսումնասիրությունների իրականացման գործում՝ կամրջելով գիտելիքն ու քաղաքականությունը և նպաստելով առավել անվտանգ, բարեկեցիկ ու արդար պետության կառուցմանը:

Հաշվի առնելով հիմնադրումից ի վեր Կենտրոնի արձանագրած հաջողությունները, կուտակած փորձն ու ձևավորած հեղինակությունը, ինչպես նաև փորձագիտական և կազմակերպական ռեսուրսներն ու կարողությունները՝ 2021 թվականին Կենտրոնի հետազոտական գործունեության առանցքում են լինելու հետևյալ հիմնախնդիրները՝

- պատերազմի և COVID-19 համավարակի տնտեսական հետևանքների գնահատում, առկա հիմնախնդիրների լուծման ուղղությամբ որակապես նոր մոտեցումների առաջադրում,
- տարածաշրջանի երկրների և աշխարհաքաղաքական կենտրոնների հետ երկկողմ տնտեսական հարաբերությունների ուսումնասիրություն և նոր զարգացման հնարավորությունների բացահայտում,
- երկրի տնտեսության զարգացման գերակայությունների ուղղությամբ հետազոտությունների իրականացում,
- երկրի արդյունաբերական կարողությունների բարելավում,
- թվային տնտեսության զարգացում,
- երկրի արտաքին քաղաքականության արդյունավետության բարձրացում և անվտանգության ամրապնդում,
- բարձրագույն կրթության համակարգի արդիականացում,
- Համալսարանի միջազգայնացում և խորհրդանշական կապիտալի (ճանաչվածություն, վստահելիություն, հեղինակություն, ազդեցություն) գեներացում:

Վերոնշյալ ուղղությունների հիման վրա Կենտրոնը նախատեսում է հասնել հետևյալ հիմնական արդյունքներին՝

1. ՀՀ գործադիր և օրենսդիր իշխանության մարմինների, մասնավոր հատվածի, ինչպես նաև արտերկրի և հայրենական ուղեղային կենտրոնների հետ առկա համագործակցության ամրապնդում և գործընկերային ցանցի ընդլայնում,
2. որոշում կայացնողների, ակադեմիական հանրույթի և լայն հասարակության շրջանում Կենտրոնի ճանաչելիության ու հանրային քաղաքականությունում

- ազդեցության բարձրացում,
3. ակադեմիական գործունեության ակտիվացում, այդ թվում՝ արտաքին (արտահամալսարանական) միջոցների ներգրավման միջոցով,
 4. գիտական արդյունքների առևտրայնացման ուղղությամբ շարունակական աշխատանքների իրականացում:

ԿԵՆՏՐՈՆԻ ԳՈՐԾՈՒՆԵՈՒԹՅԱՆ ՈՒՂՂՈՒԹՅՈՒՆՆԵՐԸ

1. Հրապարակման ենթակա հետազոտություններ

1.1. Մրցույթով, ներբուհական միջոցներով հետազոտություններ

Մրցույթով, ներբուհական միջոցներով հետազոտությունները կիրականացվեն Համալսարանի գիտական խորհրդի 2019 թվականի դեկտեմբերի 18-ի N 1 որոշմամբ հաստատված «Հայաստանի պետական տնտեսագիտական համալսարանի «Ամբերդ» հետազոտական կենտրոնի հետազոտական թեմաների և խմբերի ձևավորման, դրանցում ասպիրանտների և ուսանողների ներգրավման կարգին» համապատասխան:

Մրցույթի թեմաները կորոշվեն հետևյալ կառուցակարգով. Կենտրոնի կողմից կիրականացվեն ներքին և արտաքին շահառուների հետազոտական կարիքների վերհանմանն ուղղված քննարկումներ, որոնց արդյունքների ամփոփմամբ կձևավորվեն առաջարկվող հետազոտական թեմաների ցանկը, դրանց արդիականության հիմնավորումները, կատարման ընթացքին, բովանդակությանը, հրապարակմանը, հանրայնացմանն առնչվող տեխնիկական առաջադրանքների նախագծերը և կներկայացվեն Կենտրոնի Փորձագիտական խորհրդի հաստատմանը: Կենտրոնի մասնագիտացման հիմնական բնագավառներն են՝ մակրոտնտեսական կայունության, հարկաբյուջետային և դրամավարկային քաղաքականության, արտաքին հատվածի, ֆինանսական շուկաների և ինստիտուտների, մրցունակության, շուկաների, մրցակցության, գների և գնաճի, հանրային քաղաքականության, գործարարության, վարչարարության, արտաքին տնտեսական հարաբերությունների, կրթական գործընթացի կազմակերպման և կրթական տեխնոլոգիաների հետ կապված, ինչպես

նաև տնտեսության զագացման համար հետաքրքրություն ներկայացնող, այդ թվում՝ միջգիտակարգային բնույթի այլ ուսումնասիրությունները:

Նախատեսվում է ներքին և արտաքին շահառուների կարիքների վերհանման և քննարկման արդյունքների հիման վրա մրցութային կարգով իրականացնել շուրջ 10 հետազոտական թեմաներ:

1.1.1. Հանրային քննարկումների անցկացում

2021 թվականին նախատեսվում է Հայաստանի տնտեսության, քաղաքականության և տարածաշրջանային նշանակության հարցերի, այդ թվում՝ Կենտրոնի կողմից իրականացվող հետազոտությունների թեմատիկ ուղղվածությունից բխող խնդիրների վերաբերյալ հանրային քննարկումների և կլոր-սեղանների անցկացում:

1.1.2. Առանձին փաստերի շուրջ անհիմացիոն հակիրճ հոլովակներ

Ուղեղային կենտրոնների միջազգային փորձի ուսումնասիրությունը ցույց է տալիս, որ իրականացվող հետազոտությունների, վերլուծությունների և դրանց արդյունքների նկատմամբ հանրության ուշադրությունը գրավելու, դրանք առավելագույնս տարածելու և այդպիսով Կենտրոնի ճանաչվածությունն ու ազդեցությունը մեծացնելու համար լայնորեն կիրառվում է վիզուալացման, այդ թվում՝ անհիմացիոն կարճ հոլովակների պատրաստման և թողարկման պրակտիկան: Ելնելով վերոնշյալից՝ նախատեսվում է որպես Կենտրոնի «թվային ռազմավարության» բաղադրիչ աստիճանաբար ներդնել վերոնշյալ փորձը: Թեև այս խնդրի իրագործումը նախատեսված էր նաև Կենտրոնի 2020 թվականի գործունեության ծրագրով և պետք է մեկնարկեր դեռևս նախորդ տարի, սակայն հաշվի առնելով համավարակի, պատերազմական և հետպատերազմական շրջանում այս ուղղությամբ աշխատանքների կազմակերպման բարդությունները, ինչպես նաև ի հայտ եկած այլ առաջնահերթությունները, այս ուղղությամբ աշխատանքները կակտիվացվեն 2021 թվականին:

Հնարավորության դեպքում կմշակվեն 2020 թվականին իրականացված 13 հետազոտությունների վերաբերյալ 3-4 թույլ տևողությամբ անիմացիոն տեսահոլովակներ:

1.2. Մրցույթով, արտաքին ֆոնդերի ներգրավմամբ հետազոտություններ

2021 թվականի ֆոնդահայթայթման աշխատանքները կշարունակվեն հետևյալ ուղղություններով.

- անդամակցություն ուղեղային կենտրոնների միջազգային ցանցերին և մասնակցություն թեմատիկ սեմինարներին, կոնֆերանսներին,
- հետազոտական նախագծերի պատրաստում պոտենցիալ ֆոնդերին ներկայացնելու համար, ինչպես նաև 2019-2020 թվականներին մշակված, բայց ֆինանսավորում չստացած նախագծերի համար ֆինանսավորման նոր հնարավորությունների հայթայթում: Կենտրոնի աշխատակազմի, ինչպես նաև համալսարանի որոշ ամբիոնների մասնակցությամբ կմշակվեն ծրագրային սեղմագրեր և ամբողջական հետազոտական նախագծեր հետևյալ հիմնադրամների ընթացիկ և հետագայում ակնկալվող մրցույթներին ներկայացնելու համար՝
 - Տնտեսագիտական փորձարարական հետազոտությունների միջազգային հիմնադրամ (International Foundation for Research in Experimental Economics),
 - Բալթյան և Արևելյան Եվրոպայի ուսումնասիրությունների հիմնադրամ (Foundation for the Baltic and East European Studies),
 - «Ֆոլկսվագեն» հիմնադրամ (The Volkswagen Foundation),
 - Շվեդական ինստիտուտ (The Swedish Institute),
 - Ամերիկայի Միացյալ Նահանգների Գերմանական Մարշալ հիմնադրամ (The German Marshall Fund of the United States),
 - Եվրասիական տնտեսական հանձնաժողով (Евразийская экономическая комиссия),
- մասնակցություն տեղական մրցույթներին՝

- ՀՀ ԿԳՄՄՆ գիտության կոմիտեի մրցույթներ,
- ՀՀ-ում գործող դեսպանությունների և արտասահմանյան կազմակերպությունների կողմից հայտարարվող մրցույթներ:

1.3. «Ամբերդ» տեղեկագրի պարբերական հրապարակում

2019 թվականի դեկտեմբերից առ այսօր լույս է տեսել «Ամբերդ» տեղեկագրի 7 համար: Տեղեկագիրը հրապարակվում է տարեկան 6-անգամյա պարբերականությամբ և 2021 թվականին նախատեսվում է շարունակել սկիզբ առած գործընթացը: Տեղեկագրի հոդվածների առանցքում կլինեն Հայաստանի տնտեսության, գլոբալ նշանակության և հանրային քաղաքականության այլ ոլորտներին առնչվող առավել արդիական խնդիրները, որոնք հիմնված լինելով փաստերի և փորձագիտության վրա՝ հանրամատչելի ձևաչափով կներկայացվեն լայն հանրությանը: Տեղեկագրի հրապարակման շարունակականության ապահովումը կնպաստի Համալսարանի և Կենտրոնի ճանաչվածության, հեղինակության և ազդեցության մեծացմանը, ակադեմիական խոսույթի զարգացմանը, Հայաստանի առջև ծառայած մարտահրավերների բացահայտմանը, ինչպես նաև տարբեր գաղափարների գեներեցման և զարգացումների տարբեր սցենարների մշակմանը: Միաժամանակ, արտերկրի լսարանին հասանելի դառնալու նպատակով 2021 թվականին նախատեսվում է տեղեկագրի մեկական օրինակ հրապարակել անգլերենով և ռուսերենով:

2020 թվականին «Ամբերդ» տեղեկագիրը ներառվել է Կիբեռլենինկա (Cyberleninka) բաց հասանելիության (Open Access) գրադարանում, ինչը հետազոտողների շրջանում բարձրացրել է ոչ միայն տեղեկագրի, այլև Համալսարանի և Կենտրոնի ճանաչվածությունն ու ազդեցությունը և ապահովել մեր հաստատության ներդրումը **բաց գիտության** (Open Science) հարացույցի զարգացման գործում: 2021 թվականին նախատեսվում է շարունակել աշխատանքները համանման այլ հարթակներում տեղեկագրի ներկայացվածությունը ընդլայնելու ուղղությամբ: Մասնավորապես՝ արդեն իսկ պաշտոնական հայտ է ներկայացվել հանրահայտ

ResearchGate ակադեմիական ցանցին՝ «Ամբերդ» տեղեկագիրն իրենց շտեմարանում գրանցելու համար:

1.4. Կենտրոնի ճանաչելիության բարձրացում

2021 թվականին նախատեսվում է շարունակել իրականացնել աշխատանքներ, որոնք կնպաստեն Հայաստանի և արտերկրի ակադեմիական շրջանակներում Կենտրոնի ճանաչելիության բարձրացմանը: Մասնավորապես՝ շարունակվելու են աշխատանքները միջազգային համացանցային տարաբնույթ մասնագիտացված շտեմարաններում Կենտրոնի գրանցման, տեղեկատվության պարբերական թարմացման, գործընկերային ցանցի ընդլայնման, Փենսիլվանիայի համալսարանի ուղեղային կենտրոններին վարկանիշավորող հաստատության հետ մշտական կապի ապահովման և փոխգործակցության խորացման ուղղությամբ:

2021 թվականին այս ուղղությամբ նախատեսվող քայլերից հարկ է առանձնացնել՝

- Կենտրոնի պաշտոնական կայքի ստեղծումը,
- սոցիալական ցանցերում Կենտրոնի ներկայացվածության ընդլայնումը,
- ԶԼՄ-ների հետ համագործակցության ակտիվացումը:

Մասնավորապես՝ նախորդ տարի Կենտրոնի կայքի ստեղծման ուղղությամբ սկսված աշխատանքները կշարունակվեն 2021 թվականին: Կայքի գործարկումից հետո նախատեսվում է ներդնել նաև Կենտրոնի հետազոտողների պատրաստած վերլուծական աշխատանքների նոր ձևաչափեր, այդ թվում՝ հանրային հնչեղություն ստացած և օրակարգային հարցերի վերաբերյալ փորձագիտական հակիրճ մեկնաբանությունների (comments) հրապարակման տեսքով: Բացի այդ, ՀՀ կենտրոնական բանկի, ֆինանսների նախարարության, վիճակագրական կոմիտեի և այլ մարմինների կողմից պարբերական հրապարակումների վերաբերյալ տարբեր թեմաների մասով կներկայացվեն Կենտրոնի համառոտ մոտեցումները: Վիճակագրական տարբեր աղբյուրների պարբերական ուսումնասիրությունը ոչ միայն կապահովի ընթացիկ հետազոտության անընդհատությունը, այլ նաև ի հայտ կբերվեն թեմաներ միջնաժամկետ և երկրաժամկետ հետազոտությունների համար:

Միաժամանակ, ի լրումն Facebook, LinkedIn և Twitter ցանցերում արդեն մի քանի տարի հաջողությամբ գործող էջերի՝ 2020 թվականի դեկտեմբերին Telegram հավելվածում ևս բացվել է Կենտրոնի պաշտոնական ալիքը, որն, ըստ էության, առաջինն է հայաստանյան ուղեղային կենտրոնների շրջանում: Նշենք նաև, որ ալիքի գործունեության մեկ ամսում բաժանորդների քանակը հասել է շուրջ ութ տասնյակի, ինչը թեև դեռևս մեծ թիվ չէ, սակայն հաշվի առնելով ալիքի բացումից հետո անցած կարճ ժամանակահատվածը, Հայաստանում մասնագիտացված ալիքների նկատմամբ հանրության շրջանում առկա հետաքրքրվածության մակարդակը և մի շարք այլ տեղական առանձնահատկություններ, կարելի է լավ արդյունք համարել: 2021 թվականին այս ուղղությամբ աշխատանքները նույնպես շարունակական բնույթ են ունենալու:

2. Արտաքին ֆոնդերի ներգրավմամբ կրթական ծրագրերի մշակում և համակարգում

Կրթական ծրագրերի ֆոնդահայթայթման համար նախատեսվում է.

- ՀՊՏՀ միջազգային կապերի բաժնի հետ համատեղ ներկայացնել նախագիծ Ավստրիական զարգացման գործակալության (The Austrian Development Agency) 2021 թվականին ակնկալվող մրցույթին:
- Կոփտարկվեն նաև Հետազոտությունների և բարձրագույն կրթության բնագավառում միջազգային համագործակցության շվեդական հիմնադրամի (The Swedish Foundation for International Cooperation in Research and Higher Education) մրույթներին դիմելու հնարավորությունները:

3. Այլ հետազոտություններ

3.1. Համագործակցություն պետական կառավարման և տեղական ինքնակառավարման մարմինների հետ

Համալսարանը համապատասխան առաջարկներով դիմելու է ՀՀ անվտանգության խորհուրդ, ՀՀ առողջապահության, բարձր տեխնոլոգիական

արդյունաբերության, էկոնոմիկայի, կրթության, գիտության, մշակույթի և սպորտի, տարածքային կառավարման և ենթակառուցվածքների, աշխատանքի և սոցիալական հարցերի նախարարություններ, ինչպես նաև ՀՀ կառավարությանն առընթեր պետական եկամուտների կոմիտե և ՀՀ տնտեսական մրցակցության պաշտպանության պետական հանձնաժողով՝ Կենտրոնի հետազոտական ուղղությունների շրջանակներում ներկայացնելու իրենց գործառույթներին առնչվող հետազոտական թեմաներ:

Հետազոտական թեմաներն ամբողջացնելուց, համապատասխան շահառուների հետ քննարկելուց հետո դրանք կներկայացվեն Համալսարանի գիտական խորհրդի հաստատմանը և սահմանված կարգին համապատասխան կհայտարարվեն մրցույթներ:

Արդեն իսկ ստորագրված հուշագրերի շրջանակներում կշարունակվի համագործակցությունը Հայաստանի Հանրապետության անվտանգության խորհրդի, Հայաստանի Հանրապետության Ազգային ժողովի ֆինանսավարկային և բյուջետային հարցերի մշտական հանձնաժողովի, Հայաստանի Հանրապետության տնտեսական մրցակցության պաշտպանության պետական հանձնաժողովի, Հայաստանի Հանրապետության վարչապետի աշխատակազմի «Հանրային կապերի և տեղեկատվության կենտրոն» ՊՈԱԿ-ի, այլ մարմինների և կազմակերպությունների հետ:

Համագործակցության առաջնահերթ ուղղություն կդիտարկվի նաև Հայաստանի Հանրապետության կառավարության գործունեության ծրագրերի և ռազմավարությունների իրականացման նկատմամբ մշտադիտարկումը և բարելավման ուղղությամբ առաջարկների ներկայացումը, ինչպես նաև հանրային քաղաքականության մարտահրավերների ու բացերի ուսումնասիրությունը: Կենտրոնի կողմից առանձնահատուկ ուշադրության կարժանանան Հայաստանի Հանրապետության կառավարության կողմից ներկայացված հանրային հնչեղություն ստացած իրավական ակտերի նախագծերը:

3.2. Մասնավոր պատվերով հետազոտություններ

Կենտրոնի հեղինակության բարձրացման, ինչպես նաև արտաքին մասնավոր շահակիցների որոնման դաշտում Կենտրոնի հետազոտական առաջարկի առավել արդյունավետ դիրքավորման նպատակով 2021 թվականին անհրաժեշտ է լուծել Կենտրոնի սեփական կայքի ձևավորման, ներկայացուցչական ծախսերում ոլորտային ցուցահանդեսներին մասնակցության ծախսերի ներառման, ինչպես նաև «Սփյուռ» և այլ տեղեկատվական համակարգերում Կենտրոնի հետազոտական առաջարկի փաթեթի ձևավորման և գրանցման խնդիրները: Մասնավորապես՝ տեղեկատվական համակարգերում Կենտրոնի հետազոտական առաջարկի առավել ընդգծման նպատակով նպատակահարմար է սեփական առաջարկը տեղակայել վերջինի գործունեության դասակարգչի հետևյալ դաշտերում՝ տեղեկատվություն, հետազոտություններ, մշակումներ, կրթություն, ծառայություններ, զարգացման ծրագրերի մշակում և իրականացում ուղղություններում:

Հաշվի առնելով, որ տնտեսության համար ռազմավարական նշանակություն ունեցող ծրագրերի առավել արդյունավետ իրականացումը հնարավոր է միայն պետություն-մասնավոր հատված համագործակցությամբ՝ ուղղված ֆինանսական գործիքների ներդրմանը, կառավարման համակարգերի բարելավմանը, արտադրական կարողությունների ընդլայնմանը, տնտեսության արտադրողական ներուժի զարգացմանը, տեխնոլոգիական առաջընթացին և օտարերկրյա ներդրումների խթանմանը, Կենտրոնը կարող է մշակել և ներկայացնել պետություն-մասնավոր հատված համագործակցության ծրագրերի նախագծեր:

3.3. Ներբուհական օգտագործման հետազոտություններ

2021 թվականին նախատեսվում է շարունակել Կենտրոնի կողմից ներբուհական օգտագործման հետազոտությունների իրականացումը: Այս նպատակով նախատեսվում է իրականացնել 1-2 հետազոտություններ:

Կենտրոնի կողմից կկազմակերպվի և կիրականացվի էսսեների 1-ական մրցույթ բակալավրիատի ուսանողների և մագիստրանտների շրջանում՝ տնտեսության համար առավել արդիական թեմաներով:

4. Դասընթացների անցկացում

Համավարակով պայմանավորված՝ իրավիճակի կայունացումից հետո 2021 թվականին նախատեսվում է կազմակերպել թեմատիկ դասընթացներ: Կախված թեմատիկ ուղղվածությունից՝ դասընթացների թիրախային լսարանը կարող են լինել ուսանողները, պետական կառավարման, տեղական ինքնակառավարման, մասնավոր հատվածի և գործարար շրջանակները և առհասարակ հետաքրքրված անձինք:

Նախատեսվում է դասընթացներ կազմակերպել, առաջին հերթին՝ տնտեսական դիվանագիտության վերաբերյալ: Ընդ որում՝ նպատակային լսարանը պետք է լինեն պետական համակարգի աշխատակիցները և համակարգում աշխատել ցանկացողները: Դասընթացի նպատակը պետք է լինի պետական կառավարման համակարգի աշխատակիցներին այդ գիտելիքներով զինելը:

Կենտրոնի առաքելությունից բխող գործառույթների արդյունավետ իրականացման նպատակով անհրաժեշտ է նպաստել Համալսարանում թողարկվող մտավոր արտադրանքի որակի բարձրացմանը, դասախոսական կազմի համար թրեյնինգների կազմակերպմանը, մագիստրատուրայի ուսանողների շրջանակից ընտրել խումբ (8-10 հոգանոց) և նրանց հետ կազմակերպել հատուկ դասընթացներ տնտեսագիտական վերլուծության հմտությունների գործիքակազմի կատարելագործման նպատակով:

Ընթացիկ ակտիվությունը ապահովելու համար կարող են կազմակերպվել տնտեսագիտական և միջգիտակարգային թեմաներով ելույթներ, բանավեճեր, խաղեր և քննարկումներ:

Որպես դասընթացների կազմակերպման յուրահատուկ մեխանիզմ կդիտարկվի ամառային դպրոցի կազմակերպում:

5. Տվյալների բազայի ստեղծում

2021 թվականին նախատեսվում է ստեղծել տվյալների բազա, որը հնարավորություն կտա Համալսարանի բոլոր շահառուներին անվճար օգտվել համաշխարհային տնտեսությանը և Հայաստանի տնտեսությանը վերաբերող լայնածավալ տեղեկատվական ռեսուրսից և այդ տվյալների հիման վրա իրականացնել բազմաբնույթ հետազոտություններ: Տվյալների բազան իրենից կներկայացնի վիճակագրական տվյալների մուտքագրման, պահպանման, ելքագրման և գրաֆիկական պատկերների կառուցման հարթակ, եռալեզու՝ հայերեն, ռուսերեն, անգլերեն, աշխատելու հնարավորությամբ: Նախատեսվում է, որ հարթակն օժտված կլինի ամբողջական ծրագրային ապահովման փաթեթով կամ կներառի անժամկետ օգտագործման լիցենզիայի տրամադրման ծառայություն:

Հարթակը բաղկացած կլինի 3 հիմնական բաղադրիչներից՝ Հանրային համակարգ, Կառավարման համակարգ և Օգտատիրոջ համակարգ: Տվյալների հետագա մուտքագրման աշխատանքները կապահովվի Կենտրոնի ուժերով:

Գիտական խորհրդի նախագահ՝

Ղ. Ռ. Գալոյան

2021 թ. մարտի 2

Երևան

